

awer esou, datt mer op den Avis vun der Commission nationale d'éthique waarden. Deen ass 2023 ugefrot ginn. Mir hunn d'lescht Joer e Rappel gemaach, fir deen endlech ze kréien. E schéngt drop an drun ze sinn ze kommen, mee mir brauchen deen onbedéngt, fir kënne weiderzemaachen. An ech war gëschter nach am CHL fir 20 Joer PMA zu Lëtzebuerg an et sinn effektiv eng ganz Rei Froen, déi sech stellen a wou mer Äntwerten drop brauchen hei zu Lëtzebuerg. An dat sinn an alleréischter Linn, wéi gesot, eethesch Froen.

Fakt ass awer, datt dee Blocage, dee mer e bëssen hunn duerch dee Manktum an engem Bioethikskader, eis net dovunner ofhält weiderzeschaffen an datt mer probéieren, step by step déi Ongerechtheeten aus dem Wee ze schafen.

Dir hutt déi éischt Etapp vum Adoptiounsgesetz ugeschwat, dat mer d'lescht Joer hei zesummen och diskutéiert hunn, dat et eeben och net nëmme bestuete Koppelen, mee och gepacste Koppelen, normale Koppelen, déi net iergende Lien soss hunn, an Eenzelpersonen eeben erlaabt, kënnen ze adoptéieren. Ech mengen, dat war e ganz wichtige Schrëtt an dee mécht d'Saach awer och e bësse méi einfach.

Déi zweet Etapp ass: Mir krute viru Kuerzem och den Avis vum Staatsrot iwwert den Accès aux origines. Do schaffe mer am Moment och äifreg un Amendementen, fir deem Avis Rechnung kënnen ze droen. Dat maache mer zesumme mam Educationnministère. Do geet et dann herno drëm, dass een Informatioun kann hannerleeën, wann e Kand zur Adoptioun fräig gëtt, oder datt e Kand och kann Informatiounen froen iwwer seng biologesch Elteren, wann et notament eeben och iwwer eng Procréation médicalement assistée op d'Welt komm ass.

An dann dat, wat, mengen ech, jo ganz wichteg ass a wat och am Accord de coalition steet: Mir schaffe un där sougenannter Reconnaissance automatique. Och do hänke mer e bëssen, well mer kee Bioethikskader hunn. A wann ee sou kuckt, wat am Ausland, och notament an der Belsch, a Frankräich an a Spuenie gemaach ginn ass, hunn déi all esou e Kader. Dat heescht, eis grouss Erausforderung ass: Wat kënne mer maachen, éier mer deen hunn? Well wa mer den Avis hunn, wësse mer, datt mer nach net muer de Kader hunn, fir awer parallel scho kënne weiderzeschaffen. An ech hu mat engem Lëtzeburgerischen Expert Gespräicher, fir deen ze mandatéieren, fir eebe genau ze kucken, wéi mer et juristeschem émsetze kënnen ouni Bioethikskader, well ech wierklech wëll weiderkommen an deem Dossier.

Dann ass d'Fro, ob een net och schonn den Delai eeben, deen et brauch, fir en neigebuerent Kand ze adoptéieren, ka reduzéieren, fir awer och do schonn e bësse kënnen ze hëllefen, och wann natierlech de Wee vun der Adoptioun net soll de Wee sinn, dee mer herno wäerte goen. Mee en attendant kéint een awer och dat scho maachen. Mir probéieren och, méi Transparenz an déi administrativ Demarchen ze kréien, einfach fir de Leit, well hir Situatiounen esou villfältig sinn duerch eeben déi verschidden Nationalitéiten, déi se hunn, besser Hëllefstellung och ze leeschte fir all déi Demarchen, déi se musse maachen.

An da schaffe mer un engem Projet de loi fir eeben an der Filiatioun, well am Filiatiounsgesetz, wéi et haut steet, sinn eng ganz Rei Saachen, déi net méi zäitgeméiss sinn. Mir schwätzen nach vun „enfant naturel“, „enfant légitime“. Och do probéiere mer, déi Dispositiounen, déi vum Staatsrot positiv aviséiert sinn, awer elo mol schonn ofzehaken, fir datt mer och do méi Gerechtegkeet kënne schafen.

An ech mengen, Dir hutt effektiv all déi Congéen och ugeschwat. An ech géing och, esou wéi ech weiderkommen, eng Kéier d'Gespräich siche mat Ärem Nofolger, dem Här Hahn, fir ze kucken, wat een och scho kéint op deem Niveau eventuell en attendant maachen, éier mer dann d'Reconnaissance automatique hätten, fir do awer de Koppelen esou gutt wéi méiglech entgéintzekommen.

M. Claude Wiseler, Président | Merci, Madamm Ministre. Madamm Cahen, hutt Dir nach eng Zousatzfro?

Mme Corinne Cahen (DP) | Jo, eng kuerz. Villmools merci fir Är Äntwert. Natierlech ass et spannend, dass et no Nationalitéit geet, well jo vill Leit verschidden Nationalitéiten och hunn, och an enger Koppel. An eng Persoun ka jo zwou oder dräi Nationalitéiten hunn. Dat kléngt alles relativ komplizéiert.

Mee wäert Dir da bereet, awer elo eng Kéier zäitno mat Ärer Kolleeigin aus dem Gesondheitsministère ze schwätzen, fir ze kucken, dass dat Bioethiksgesetz dann elo wierklech kënnt, dass do wierklech e Commitment gemaach gëtt? Well dat schéngt hei awer och e bëssen den Dréi- an Aangelpunkt ze sinn. An dofir wär da meng Demande un Iech, ob Der wann ech gelift dat dann och nach eng Kéier kéint weidersoen un Är Kolleeigin, fir dass dat dann och elo kënnt.

Merci.

Mme Elisabeth Margue, Ministre de la Justice | Ech hu ganz vill Echangé mat hir. Ech war gëschter mat hir am CHL fir dee selwechten Evenement. Si huet och Leit rekrutéiert, déi sech wierklech auskenne mat der Matière. A mir waarde wierklech just nach op deen Avis vun der Eethikskommissioun. A si ass och determinéiert, dann esou schnell wéi méiglech hei virunzekommen. Merci villmools.

M. Claude Wiseler, Président | Merci, Madamm Ministre. Domat wier dann dës Punkt ofgeschloss.

5. 8156 – Projet de loi relative aux denrées alimentaires et aux matériaux et objets destinés à entrer en contact avec des denrées alimentaires

Mir géingen zum nächste Punkt vum Ordre du jour kommen, an zwar dem Projet de loi 8156 iwwer e kompletten a moderniséierte gesetzleche Kader fir d'Sécherheet vun de Liewensmëttel. D'Riedezäit ass hei de Basismodell: 10 Minutte fir d'Rapportrice, 5 Minutte fir all Fraktioun a Sensibilitéit, 10 Minutte fir d'Regierung. Et hu sech schonn ageschriwwen: d'Madamm Stéphanie Weydert, den Här Luc Emering, d'Madamm Claire Delcourt, d'Madamm Alexandra Schoos an d'Madamm Joëlle Welfring. An d'Wuert huet elo d'Rapportrice vum Projet de loi, déi honorable Madamm Stéphanie Weydert. Madamm Weydert.

Rapport de la Commission de l'Agriculture, de l'Alimentation et de la Viticulture

Mme Stéphanie Weydert (CSV), rapportrice | Villmools merci, Här President. Dir Dammen an Hären Deputéiert, de Gesetzesprojet 8156, iwwert dee mer haut ofstëmmen, schafft en neie juristesche Kader fir d'offiziell Kontrollen am Beräich vun de Liewensmëttelen an anere Produiten, déi mat Liewensmëttel a Kontakt kommen. Dës Kontrolle ginn duerch d'Lëtzeburger Veterinär- a Liewensmëttelverwaltung – am Volleksmond: der ALVA – duerghefuert a baséieren op den europäesche Bestëmmungen, besonnesch op der Grondlag vum EU-Reglement 2017/625.

De Prinzip, deen dësem europäesche Kader zugronn läit, ass dee vun der Kontroll „de la fourche à la

fourchette“, also iwwert déi ganz Liewensmëttelketten ewech. Dës entsprécht och dem Grondgedanke vum EU-Reglement 178/2002, dat d'allgemeng Prinzip vum der Liewensmëttelgesetzgebung an der Europäescher Unioun festleet.

All Etapp – vun der Primärproduktioun iwwert d'Veaarbechtung an d'Veerdeelung bis hin zum Endverbraucher – kann en Afloss op d'Liewensmëttelsécherheet hunn. Eng kohärent an effikass Organisatioun vun de Kontrollen ass dofir essenziell, fir gesond a qualitativ héichwäerteg Liewensmëttelen ze garantéieren an d'Vetraue vun de Konsumentinnen a Konsumenten an d'Integritéit vun der Liewensmëttelketten ze stäerken.

(M. André Bauler prend la présidence.)

Dës Projéit gëllt fir all Produiten, déi um Territoire vum Grand-Duché hiergestallt, verschafft oder verdeelt ginn, inklusiv de Verkaf iwwer Internet. En ëmfaasst och all d'Produiten aus aneren EU-Memberstaaten, aus Drëttlänner souwéi Produiten, déi fir den Export an Drëttstaate bestëmmt sinn.

Explizitt ausgeschloss vun dësem Gesetz ass dogéint d'Hierstellung, d'Preparatioun, d'Lagerung an d'Notzung vu Liewensmëttel fir de Gebrauch an d'Consumatioun, déi mer alleguerten doheem maachen.

Duerch dës Projéit gëtt d'ALVA als zoustänneg Verwaltung fir d'Duerchféierung vun den offiziellen Kontrollen festgeluecht. D'Kompetenze vun hiren Agenten ginn definéiert a prezisiéiert. D'Kontrolle beschränke sech op Raimlechteeten, Installatiounen, Ekipementen, Betribsitten an Transportmëttel vun den Exploitanten aus dem Liewensmëttelsektor souwéi op hir Onlineportaler.

De virleiede Projéit féiert eng grëndlech Revisioun vum aktuelle juristesche Kader duerch, deen op dem geännerte Gesetz vum 28. Juli 2018, dat e Kontroll- a Sanktiounssystem fir d'Liewensmëttel ariicht, baséiert. Zil ass et, d'Moyene vun de Kontrollagenten ze harmoniséieren a se un déi aner sektoriell Gesetzgebungen unzepassen, déi an de Kompetenzberäich vun der ALVA falen.

Weinst der Envergure vun de geplangten Ännerunge gouf dofir elo net e bëssen an deem alen Text gebastelt, mee et gouf en neien normative Kader geschaf an déi aktuell Gesetzgebung vun 2018 an dem Beräich vun de Liewensmëttelkontrolle wäert ofgeschafft ginn. D'Reglementer vum ale Gesetz bleiwen awer a Kraaft, souwäit se nach kompatibel si mat dësem Gesetz oder net expressis verbis ofgeschafft ginn.

Dës Gesetzesprojet gesäit kloer Prozedure vir, ënnert deenen d'Agenten vun der ALVA d'Liewensmëttelkontrollen duergheféieren, a wat si berechtigt sinn, op dem Site ze maachen am Kader vun hiren Missioun. Natierlech huet den Exploitant och eng Rei Rechter, wéi zum Beispill datt e sech an Avis vun engem zweeten Expert op seng eege Käschte ka froen am Kader vun den offiziellen Kontrollen, souwéi och divers Recoursméiglechkeete géint déi administrativ Mesuren.

Wat d'Sanktiounen ubelaangt, sou huet den initiale Projéit e System vu Kontraventiounen an Delikter virgesinn. D'Kontraventiounen goufen awer am legislative Prozess duerch administrativ Amendementen tëschent 250 an 10.000 Euro ersat. De Minister huet soumat d'Méiglechkeet, eng Amende administrative ze schwätzen, an hält fir seng Decisioun och déi relevant Émstänn a Betreecht, a gegebenefalls d'Gravitéit an d'Dauer vum Verstooss, de Grad vun der Responsabilitéit vum Exploitant an eventuell viregt Verstéiss, déi och scho vun deem selwechten Exploitant oder Produzent gemaach goufen.

Wat d'strofrectle Sanktiounen ugeet, do gesäit de Projet vir, datt Verstéiss géint d'Bestëmmunge vum Gesetz mat enger Prisongsstrof vun aacht Deeg bis sechs Méint an enger Geldstrof vun 251 bis 250.000 Euro bestrooft kënne ginn oder mat nëmmen enger vun dese Strofen. A méi schwéiere Fäll kënnen d'Strofen op eng Prisongsstrof vu sechs Méint bis dräi Joer an eng Geldstrof vu 50.000 bis 500.000 Euro eropgoen. Dës Sanction-pénalle gi virun allem da geschwat, wann e Risiko fir d'mënschlech Gesondheet besteet oder gesondheetsschiedlech Produiten oder net méi iessbar Produiten do sinn a wann do eng Gefor besteet. Am Fall vun enger Recidive bannent zwee Joer oder am Fall vun engem Bedruch kënnen déi Strofe verduebelt ginn. Dat Ganzt ass soumat am Respekt vum Prinzip vum der Proportionalitéit, awer och vun der Individualiséierung vun de Strofen.

D'ALVA kritt des Weideren d'Méiglechkeet, urgent Moosnamen ze huelen, am Fall wou net konform Déieren oder Gidder an d'EU agefuert ginn an d'est e Risiko duerstellt. Dës Noutmoosnamen hunn eng Gültigkeet vu maximal 48 Stonnen. Um Enn vum Delai gëtt dann en zweete Contrôle duerchgefuert an d'Moosname kënnen eventuell nach verlängert ginn, falls d'Nonkonformitéit nach ëmmer net aus dem Wee geschaf gouf oder do, wou eng imminent an uerg Gefor fir d'mënschlech Gesondheet fortbesteet. Bannent fënnf Deeg muss dann den zoustännige Minister d'Verlängerung vun der Frist accordéieren an e kann och dann nach eng zousätzlech Verlängerung erméiglechen.

Am Fall vun enger Nonkonformitéit zu deem Gesetz kann de Minister dem Exploitant och eng Frist vu maximal sechs Méint setzen, fir sech nees en règle mam Gesetz ze setzen. Wann dës Frist natierlech net agehale gëtt, dann huet de Minister d'Recht, den Agreement fir eng gewëssen Zäit auszesetzen oder ze entzéie respektiv d'Entreprise ganz zouzemaachen. A géint esou eng Decisioun kann natierlech och den Exploitant e Recours virum Verwaltungsgeriicht maachen.

Dese Gesetzesprojet ass Deel vun enger méi breeder Reform vun de Kontrollmechanismen am Beräich vun de Liewensmëttelen an der Déieregesondheet. Ech mengen, mir hunn hannerenno nach e Projet, deen an déi selwecht Richtung geet, um Ordre du jour. Parallel zu deem Gesetz ass och d'Basisgesetz vun der ALVA ugepasst ginn, fir eng besser Kohärenz tëscht de verschiddene sektoriellen Texter ze garantéieren.

Da wéilt ech nach e bëssen op déi eenzel Avisen agoen, déi alleguerten d'Wichtigkeet vun de Liewensmëttelkontrollen ënnerstrach hunn.

De Staatsrot huet a sengem Avis vum 25. Juni 2024 eelef formell Oppositionne formuléiert. Déi héich Kierperschaft huet besonnesch eng méi kloer Kompetenzopdeeling tëscht der ALVA an dem Minister souwéi Upassunge bei den Taxen, bei der Formation vun den Agenten a bei de strofrectleche Sanktiounen gefuerdert. De Staatsrot huet awer och d'Publikation vun de Kontrollresultater a Fro gestallt, déi ursprënglech virgesi war. Doropshi gouf um Gesetzestext mat Amendementen vun der Regierung nogebessert. De Mechanismus vun den Astreinté gouf suppriméiert an d'Kontraventionen sinn duerch administrativ Amendementen ersat ginn. A sengem Zousazavis vum 20. Januar 2026 konnten déi meescht Oppositionen formelles opgehuwe ginn. Zwou bloufen der bestoen, déi d'Agrarkommission an hire parlamentareschen Amendementen zum Text berücksichtigt huet.

De Collège vétérinaire huet a sengem Avis vum 25. März 2023 zum initialen Text virun allem Kritik an

der neier Prozedur bei den Noutmoosnamen geäussert, déi hie fir ze schwéierfällg hält, souwéi op Inkohärenzen tëscht eenzelne Bestëmmunge bei der Dauer an der Kompetenz vun de Mesuren higewisen.

D'Chambre des Métiers ënnerstëtzt och de Projet am Prinzip, huet awer fir eng méi grondleeënd legislativ Konsolidéierung am Secteur agroalimentaire plädéiert. Si huet Virbehalter géintwärtig der Publikation vun de Kontrollresultater bei den Noutmoosnamen souwéi bei den Taxen fir d'Kontrollen.

D'Chambre de Commerce huet de Projet och begréisst, awer eng besser Harmoniséierung mam besteende Rechtskader gefuerdert. Si huet sech fir en adequate System bei der Publikation, kloer Reegele fir d'Taxen a fir eng praktesch ëmsetzbar Noutprozedur ausgeswat. An hirem Zousazavis huet se d'Regierungsamendementen awer ausdrécklech begréisst.

D'Landwirtschaftskummer huet sech virun allem géint d'Publikation vun de Kontrollresultater ausgeswat. Si huet virun allem bedauert, datt et net een eenzege Text gëtt, deen all d'Kontrollen am Liewensmëttelberäich rassembleiert. Des Weideren huet se Präzisiounen bei den Taxen souwéi de Friste gefuerdert a sech am Zousazavis géint d'Sträiche vum Begrëff „infraction grave“ am Kontext vum Zougang zu de Raimlechkeeten ausgeswat. Also, eigentlech ass just de „grave“ erauskomm.

Den 9. Oktober 2025 huet d'Landwirtschaftsministerin Martine Hansen 26 Amendementen an der zoustänneger Kommission presentéiert, an deenen d'Observationen souwuel vum Staatsrot wéi och vun de Berufschambere berücksichtegt goufen. Si betreffen ënner anerem d'Präzisiounen bei der zoustänneger Autoritéit, d'Fusion vum de Bestëmmungen iwwert d'Taxen an d'Iwwerschaffung vum Infractionskatalog.

Fir weider Detailer verweisen ech op mäi schrëftleche Rapport, deen de 26. Februar dës Joer vun der Agrarkommission ugeholl gouf.

Ech soen Iech Merci hefir an ech doen elo mäin Hutt als Rapportrice of a schwätzen nach e puer Wuert als Spriecherin vun der CSV-Fraktion.

Discussion générale

Här President, Dir Dammen an Dir Hären, de Gesetzesprojet, iwwert dee mer haut ofstëmmen, ass e wichtige Baustee fir eng modern, effikass a rechtsstaatlech ofgeséchercht Liewensmëttelkontroll zu Lëtzebuerg. Mat deem Text schafe mir en neie juristesche Kader fir d'offiziell Kontrollen am Beräich vun de Liewensmëttelen an de Produiten, déi mat Liewensmëttelen a Kontakt kommen. Ech hat et virdrun a mengem Rapport gesot: Dës Kontrolle gi vun der ALVA duerchgefuert a baséieren um EU-Reglement 2017/625.

De Grondprinzip hannendrun ass kloer: D'Kontroll ëmfaasst all Schratt vun der Liewensmëttelkette vum Aker bis op den Teller oder vum Gref bis op d'Forschett – fir déi, déi nach wëssen, wat e Gref ass.

(Interruption)

Dat heescht, d'Liewensmëttelsécherheet gëtt iwwert déi ganz Kette garantéiert, vun der Primärproduktion bis bei de Konsument. Maache mer dat net, bréngen och déi beschte Kontrollen näischt. Well all eenzel Etapp kann en negativen Impakt op d'Sécherheet an och op d'Qualitéit vun eise Liewensmëttelen hunn. An nëmme wa mir eng lückelos Kontrollkette vun A bis Z hunn, da kann de Verbraucher och Vertrauen an eis Liewensmëttel hunn. Dat neit Gesetz ass also och am Sënn vun eiser Landwirtschaft, eise Baueren, Wénzer, Uebstbaueren a Gäertner. Well de Konsument keeft eis Produiten, sief et Fleesch, sief et

Mëllec, Uebst oder Geméis, nëmmen dann, wann en och ka sécher sinn, datt alles an der Rei ass.

Ech kann dofir duerchaus verstoen, datt déi concernéiert Produzenten duerch déi vill Kontrolle genervt sinn. Mee et muss ee sech awer och bewusst sinn, datt et ouni Kontrollen net geet. Well e Konsument, dee kee Vertrauen huet, dee keeft och näischt. Wéi heescht et esou schéin? „Vertrauen ist gutt, Kontrolle ist besser.“

(Interruption)

An dat gëllt virun allem dann, wann et dorëms geet, wat mir iessen.

Grad an de leschte Wochen hu mer gesinn, wéi wichtig Kontrolle sinn. Bal all Dag huet misse Baby-Pudermëllec zréckgeruff ginn, well de Risiko bestan huet, datt Cereulid an der Mëllec kéint sinn, vun deem d'Puppelcher kënne krank ginn. A grad wann et ëm Bëbeën an aner vulnerabel Mënsche geet, dann, mengen ech, ass d'Sensibilitéit nach eng Kéier méi grouss.

Esou Fäll weisen, wéi wichtig et ass, datt d'Autoritéit séier, kloer a rechtlech ofgeséchercht kënne reagéieren. D'Beispill vun der Bëbeenanung weist awer nach eppes: D'Kontrolle gräifen iwwert d'Grenze vun den eenzelne Länner ewech, an dat, well de Kontrollsystem europäesch gereegelt ass an et en harmoniséierten europäesche Kader gëtt.

Léif Kolleginnen a Kollegen, fir d'CSV ass kloer: Liewensmëttelsécherheet ass keng Optioun, mee eng Prioritéit. Mir all mussen drop vertraue kënnen, datt d'Produiten, déi mir um Maart, am Geschäft oder online kafen, sécher sinn a mir dës ouni Bedenke genéisse kënnen. Gläichzäitig mussen eis Betriber op e kloer, proportionéiert Reegeliwerk ziele kënnen, wou se wëssen, op wat se sech alosse.

Dat neit Gesetz definéiert dofir ganz genee, wien zoustänneg ass fir d'Kontrollen, nämlech d'ALVA. D'Kontrolle bezéie sech op d'Raimlechkeeten, d'Installationen an d'Transportmëttel souwéi den Onlineverkauf. An dat ass an eiser digitaler Zäit onëmgänglech. Et gëtt kloer Uweisungen, wat d'Kontrollen vun der ALVA dierfe maachen a wat net.

Op där anerer Säit sinn awer och d'Strofe fir déi, déi sech net un d'Gesetz an déi divers europäesch Reglementen halen, ganz kloer definéiert. Een, dee fudelt, dee weess also ganz genau, wat en erwaart. A gläichzäitig bleift de Rechtsstaat garantéiert: Géint administrativ Decisiounen ass e Recours virum Verwaltungsgeriicht méiglech. De Sanktionssystem gëtt moderniséiert, mat enger kloer Differenzéierung tëscht den administrativen Amendementen an de strofrectleche Sanktiounen.

Als CSV ass et eis awer besonnesch wichtig, datt dat hei Gesetz just ee Puzzlestéck vun enger méi breeder Reform vun de Kontrollmechanismen am Beräich vun de Liewensmëttelen an Déieregesondheet duerstellt. E puer Gesetzer hu mer schonn an de leschte Wochen hei gestëmmt. Op e weidert Puzzlestéck, nämlech d'Kontrolle vum Déierefudder, wäert mäi Kolleg, de Jeff Boonen, an e puer Minutten agoen. Awer Gesetzesprojeten, wéi den Text zu de Kontrolle bei de Planzeschutzmëttelen, déi sinn op der dënnere ligne droite. De Gesetzesprojet iwwert d'Kontrollen am Zesummenhang mat iwwerdreue Déierekrankheeten, deen hu mer schonn am Februar hei eestëmme am Haus ugeholl. An esou kréie mer Schratt fir Schratt e komplett neie juristesche Kader fir déi verschide Kontrollberäicher. A wa mer färdig sinn, da si mer gutt opgestallt. E kohärent Zesummespill vun diesen Texter dréit derzou bäi, eng harmoniséiert a verständlech Gesetzgebung ze garantéieren.

Am Resümme: Mir stäerken d'Liewensmëttelsécherheet, mir moderniséieren d'Kontrollinstrumenter a mir schafen eng kloer a proportionéiert gesetzlech Basis. Dat ass am Interess vum eis all. Zäitgläich ass et och am Interess vum eise Betriber. Well nëmmen esou schafe mir Vertrauen an eis Liewensmëttelen.

Domat ginn ech dann den Accord vun der CSV-Fraktioun an ech soen Iech Merci.

Plusieurs voix | Très bien!

M. André Bauler, Président de séance | Merci, Madamm Weydert, souwuel fir Äre Rapport wéi fir Äre Interventioun. An als nächste Riedner ass den honorabelen Här Luc Emering agedroen. Här Emering, dann hutt Dir d'Wuert.

M. Luc Emering (DP) | Här President, léif Kollegeginnen a Kollegen, ech soen der Madamm Weydert villmools Merci fir hire mëndlechen a schrëftleche Rapport.

Jo, mat dësem Gesetz verankere mer en eenheetlechen EU-Kader fir eis Liewensmëttelketten, dat bedeit vum Bauer bis bei de Konsument. Mir hu scho virun e puer Wochen hei eppes Änlech diskutéiert, an zwar wéi et iwwert d'Diërekränke gaangen ass. An och dat hei gëllt fir all déi Prozesser a Materialien, déi bei der Veraarbechtung vun de Wuere mat onsem Iessen a Kontakt kommen.

Am Zentrum vun dësen Texter steet d'ALVA, déi Administratioun, déi d'Aufgab huet, derfir ze suergen, datt d'Standard bei den Exploitanten agehale ginn. D'ALVA huet déi néideg Kompetenzen an och Ressourcen, fir dës zousätzlech Aufgab ze erfëllen.

Déi verschidde Gesetzter gi mat dësem Projet och méi kloer a méi transparent, dat, well mer déi verschidde sektoriell Gesetzter elo méi openeen ofstëmmen a harmoniséieren.

Wat eis ganz wichteg ass: Ech mengen, d'Madamm Weydert huet elo och vill iwwert d'Kontrollen geschwat. D'Madamm Weydert huet gesot: „Kontroll ass gutt, Vertrauen ass besser.“ Ech soen: Vertrauen ...

(Interruption)

Den Här Engel seet ...

(Interruptions)

Ech sinn amgaangen.

Mme Stéphanie Weydert (CSV), rapportrice | Ech hat et ëmgedréint gesot, Här Emering.

M. Luc Emering (DP) | Kontroll ... Jo. Vertrauen ass gutt, Kontroll ass besser.

(Interruption)

Kontroll ass gutt, Vertrauen ass besser. Esou muss et sinn. Dofir si mer och frou – dat hu mer jo och an der Kommissioun diskutéiert am Kader vun de Kontrollen –, dass déi am Virus och solle mam Exploitant ofgeschwat gi respektiv sech Rendez-vous geholl gëtt, dass net einfach d'Kontrollen onugemellt sinn, well mer dann och eng Qualitéitskontroll hikeréien, wann d'Agente während der Kontroll och vun den Exploitantë kënnen begleet ginn.

En anere Punkt, deem am Virfeld vun den Diskussiounen fir vill Opreegung gesuergt huet, sinn d'Sanktiounen, iwwert déi och elo hei geschwat ginn ass. An do begrësse mer absolutt, dass den Exploitant och am Virus weess, wat geschitt, wann e Feeler mécht. An ech mengen, dat ass eng Form vun Transparenz, an dat ass eis ganz wichteg, an och vu Gläichbehandlung. Jidderee gëtt bei deem nämmelechte Feeler d'nämmelecht sanktionéiert.

Wéi gesot, dat hei ass e Projet, dee mir nëmme kënnen ënnerstëtzen. Dat gëllt och fir den nächste Projet, deem elo wäert kommen, wou et méi genau ëm

d'Fudder geet. Et geet an déi nämmelecht Richtung. Dat hei si wichteg Schrëtt, an dat wäerte mir ënnerstëtzen. Dofir géif ech meng Fraktioun bidden, den Accord zu dësem Gesetzesprojet ze ginn.

Merci.

Plusieurs voix | Très bien!

M. André Bauler, Président de séance | Merci, Här Emering. An als nächst Riednerin ass déi honorabel Madamm Claire Delcourt agedroen.

Mme Claire Delcourt (LSAP) | Jo, merci, Här President. Léif Kollegeginnen a Kollegen, d'Madamm Weydert huet hei elo schonn enorm vill zu dësem Projet gesot. Do kann een elo natierlech net nach ganz grouss aushuelen, well dat meescht an dat Wichtegst ass gesot. A mir wäerten dëse Projet de loi natierlech matstëmmen, deem natierlech och vun der viregter Regierung kënn.

Mir gesinn et méttlerweil och e bëssen als selbstverständlech un, dass déi Liewensmëttelkontrolle gemaach ginn, mee dat war awer net ëmmer esou. An ech mengen, et ass ganz wichteg, dass mer déi Kontrollen an déi Reegelen hei opsetzen. Mir hunn awer och nach rezent gesinn – an dat gouf jo och elo schonn ugeschwat –, dass awer nach ëmmer kënnen Problemer bestoen duerch Kontaminatioun, wéi mer et eben elo haten, ab Januar, Dezember schonn. Dat heescht, et ass absolutt net verkéiert, déi Gesetzter ëmmer erëm reegelméisseg unzepassen.

A bon, dat hei geet natierlech och an dës Richtung. An hei ass d'Zil och ganz kloer, dass d'Gesondheet vun de Konsumentinnen an de Konsumenten am Mëttelpunkt steet an déi och ze schützen. An do-wéinst ass et fir eis nëmmen normal, dass mer dëse Projet de loi matstëmmen.

Merci.

Plusieurs voix | Très bien!

M. André Bauler, Président de séance | Merci, Madamm Delcourt. An als nächst Riednerin ass d'Madamm Alexandra Schoos agedroen. Madamm Schoos, Dir hutt d'Wuert.

Mme Alexandra Schoos (ADR) | Villmools merci, Här President. Jo, d'Liewensmëttelsécherheet ass immens wichteg. Ech mengen, Kontrolle ginn ëmmer gemaach. Et kann awer ëmmer och eppes geschéien. Ech erënneren drun: 2010 oder 2011 waren EHEC an de Kornischnongen. Viru véier Joer hate mer bei engem ganz renomméierte Schokelasproduzent Salmonellen. Elo dat mat der Puddermëllech. Ech mengen, Kontrolle kënnen hëllefen, kënnen de Risiko miniméieren, mee de Risiko ass ni null. Däers si mer eis alleguer bewosst.

A Kontrolle schafen och iergendwa Vertrauen. Dat muss mer hunn. De Konsument brauch Vertrauen. Dat ass wichteg. Hei muss mer awer och oppassen, dass mer eng gewësse Proportionalitéit hunn. Et dierf elo net zu onverhältnisméisseg Kontrollen an och Virschreite kommen, zemoos fir déi kleng Betriber. Ech denken do un eis eege Vermaarter, déi mer jo férdere wëllen a sou weider a sou fort. Also dat muss op jidde Fall gekuckt ginn, dass et do net zu enger Disproportionalitéit kënn an do Grousser mat deene méi kleng Betriber an een Dëppe geheet ginn.

Am grouss Ganzen natierlech begrësse mir dëse Projet a stëmmen deem dowéinst och mat.

Une voix | Très bien!

M. André Bauler, Président de séance | Merci, Madamm Schoos. An da wier et un der honorabeler Madamm Joëlle Welfring.

Mme Joëlle Welfring (déi gréng) | Merci, Här President. Jo, och menger Fraktioun géng ech

recommandéieren, dësen Text matzestëmmen. Et geet drëm, de besteende gesetzleche Kader ze stäerken, och d'Ëmsetzung vun engem wichtege EU-Text hei zu Lëtzebuerg nach besser ze verankeren.

Ech mengen, d'Virriedner si schonn drop agaang, dass mer jo an der rezenter Vergaangenheet mat der Puddermëllech drop higewise goufen, jo, wéi kriddeleg dat ka sinn, wann ee Produiten importéiert an Europa an déi dann hei verdeelt ginn. Natierlech hunn eis Servicer hei zu Lëtzebuerg och gutt fonctionéiert, zum Gléck.

Mee meng Fro, déi ... Ech mengen, ech hat virun dräi Wochen Iech d'Fro gestallt, wat Äre Bestriewunge sinn, fir an Europa eventuell déi Importer nach besser ze kontrolléieren. Deemoos hat Der mer net drop geäntwert. Ech hu gesinn, méttlerweil ass en EU-Reglement erlooss ginn, dat dat fir déi eng Zort Ueleg, déi hei e Problem duergestallt huet, eben nach verstärkt. Meng Fro geet awer méi wäit. Gëtt et net nach Bestriewungen, um EU-Niveau ze kucken, grad fir Importer vu Produiten, déi bewosst eben agesat gi fir de Konsum bei vulnerabele Populatiounen, wéi kleng Kanner, Bëbeeën, wierklech och d'Kontrolle bei den Importer ze verstärken? Well ech mengen, et ass do, wou de Problem hierkomm ass, well wa se bis heibanne sinn, ma da leeft een dem Problem no. An dat ass, mengen ech, eppes, wat eis alleguer Suerge mécht. An ech denken, et wär interessant, wann ech dës Kéier eng Äntwert géng kréien.

Merci.

M. André Bauler, Président de séance | Merci Iech, Madamm Welfring. Ech kucken an d'Ronn. Et ass jiddefalls kee méi hei agedroen. Et réiert och kee sech méi hei zu menger Rietser.

Da kéinte mer direkt zur Regierung kommen. D'Regierung huet d'Wuert, d'Madamm Landwirtschaftsministesch Martine Hansen.

Prise de position du Gouvernement

Mme Martine Hansen, Ministre de l'Agriculture, de l'Alimentation et de la Viticulture | Villmools merci, Här President. Ech wëll der ganzer Chamber e grouss Merci soe fir déi breet Zoustëmmung. Wéi gesot, et ass alles gesot. D'Liewensmëttelsécherheet ass extreem wichteg. An dofir gi mer eis hei de Kader. Mir setzen eng Partie EU-Reglementer ëm. Dofir nach eng Kéier e ganz, ganz grouss Merci, wéi gesot.

Spezifesch Bestriewungen, fir spezifesch Produkter zousätzlech Kontrollen ze maachen, gëtt et elo an deem Sënn net. Et gëtt Bestriewungen, méi Kontrollen op de Grenzen ze maachen an do och Audite vun der Kommissioun ze maachen, fir ze kucken, datt an deene Länner, wou grouss Importer erakommen, déi Kontrollen och gemaach ginn. Mee elo op spezifesch Produkter hi gëtt et dat net.

Merci.

M. André Bauler, Président de séance | Merci, Madamm Ministesch.

Da kënnen mer elo zur Ofstëmmung iwwert de Projet de loi 8156 kommen. Den Text steet am Document parlementaire 8156¹⁰.

Vote sur l'ensemble du projet de loi 8156 et dispense du second vote constitutionnel

D'Ofstëmmung fänkt un. De Quorum ass erreecht. Mir kommen elo zum Vote par procuration – a mir waarden nach e bëssen, bis verschidde Kollegen hiert Zil erreecht hunn.

(Hilarité)

Mir waarden nach e bëssen. Ech versichen, jiddwerengem eng Chance ze ginn. Voilà, da kéime mer zum Vote par procuration. De Vott ass ofgeschloss.

D'Resultat ass: 60 Jo-Stëmmen, keng Nee-Stëmm a keng Abstentioun. Domat ass de Projet de loi eestëmmeg ugeholl.

Ont voté oui : Mmes Diane Adehm, Nancy Arendt, MM. Maurice Bauer, Jeff Boonen, Alex Donnersbach (par Mme Stéphanie Weydert), Emile Eicher (par Mme Octavie Modert), Félix Eischen (par Mme Françoise Kemp), Paul Galles, Mme Françoise Kemp, MM. Marc Lies, Ricardo Marques, Georges Mischo, Mmes Octavie Modert, Nathalie Morgenthaler, MM. Laurent Mosar, Jean-Paul Schaaf (par M. Marc Lies), Charles Weiler (par Mme Nathalie Morgenthaler), Mme Stéphanie Weydert, MM. Claude Wiseler, Michel Wolter (par M. Maurice Bauer) et Laurent Zeimet ;

Mme Barbara Agostino, MM. Guy Arendt, André Bauler, Gilles Baum, Mmes Simone Beissel, Corinne Cahen, MM. Luc Emering, Patrick Goldschmidt (par M. Guy Arendt), Gusty Graas, Marc Hansen, Mmes Carole Hartmann, Mandy Minella, Lydie Polfer (par M. Gusty Graas) et M. Gérard Schockmel ;

M. Dan Biancalana (par M. Georges Engel), Mmes Taina Bofferding, Liz Braz, Francine Closener, M. Yves Cruchten, Mme Claire Delcourt, MM. Mars Di Bartolomeo, Georges Engel, Franz Fayot, Claude Haagen, Mme Paulette Lenert et M. Ben Polidori ;

MM. Dan Hardy, Fred Keup, Michel Lemaire, Mme Alexandra Schoos et M. Tom Weidig ;

Mme Djuna Bernard, M. Meris Sehic, Mmes Sam Tanson et Joëlle Welfring ;

MM. Sven Clement (par M. Marc Goergen) et Marc Goergen ;

MM. Marc Baum et David Wagner.

Freet d'Chamber d'Dispens vum zweete Vote constitutionnel?

(Assentiment)

Dann ass dat also esou entscheet.

6. 8194 – Projet de loi relative aux contrôles officiels et autres activités officielles en matière d'aliments pour animaux

Als nächste Punkt um Ordre du jour steet de Projet de loi 8194, deen dem Déierfudder e moderniséierte gesetzleche Kader gëtt. D'Riedezäit ass nom Basismodell festgeluecht an deemno folgendermoossen opgedeelt: fir de Rapporteur 10 Minutten, fir d'CSV, d'DP, d'LSAP, d'ADR, déi gréng, d'Piraten an déi Lénk jeeeweils 5 Minutten a fir d'Regierung 10 Minutten. Et hu sech schonn geschriwwen: den Här Jeff Boonen, den Här Luc Emering, d'Madamm Claire Delcourt, d'Madamm Alexandra Schoos, d'Madamm Joëlle Welfring an den Här Marc Goergen. D'Wuert huet elo de Rapporteur vum Projet de loi, den honorabelen Här Jeff Boonen. Här Jeff Boonen, Dir hutt d'Wuert.

Rapport de la Commission de l'Agriculture, de l'Alimentation et de la Viticulture

M. Jeff Boonen (CSV), rapporteur | Merci, Här President. Da komme mer elo vun de Liewensmëttel bei d'Déierfudder. Ech hunn d'Eier, Iech am Numm vun der CSV-Fraktioun de Rapport vum Projet de loi 8194 virzedroen. De Projet huet als Objet d'Afféierung vun engem kohärenten a moderne System vun offizielle Kontrollen am Beräich vum Déierfudder, dat am Aklang mam europäesche Rechtskader.

(M. Claude Wiseler reprend la présidence.)

Dat neit Gesetz ersetzt d'Gesetz vum 19. Mee 1983 iwwert d'Reglementatioun vun der Produktioun an dem

Handel mat Déierfudder a schaaft domat en neit, den aktuellen Ufuerderungen ugepasst normatiivt Fundament.

D'Zil vum Text ass et, d'Sécherheet, d'Integritéit an d'Qualitéit vum Déierfudder iwwert déi ganz Produktiouns- a Verdeelungsketten ewech ze garantéieren. Dëst betrëfft all Etapp, vun der Produktioun iwwert d'Fabrikatioun, d'Veerarbechtung an d'Distributioun bis hin zur Notzung. Explizitt mat abegraff sinn och Transaktiounen, déi iwwer Onlineakeef ofgewéckelt ginn, wann dës vu Persounen oder Entreprise mat Sëtz am Grand-Duché gemaach ginn.

De Champ d'application vum Projet ass breet gefaasst. Hie betrëfft net nëmmen dat klassesch Déierfudder, mee och Additiven, Premelangen, Fudder mat Medikamenter, Intermediaireproduiten an och spezifesch Praktiken, wéi zum Beispill d'Vermësche vu Waasser mat engem veterinärmedezinnesche Medikament. Doduerch gëtt eng ëmfaassend Reglementatioun vun all relevanten Aktivitéiten am Secteur garantéiert.

D'alimentation luxembourgeoise vétérinaire et alimentaire, d'ALVA, ass fir d'Duerchféierung vun de Kontrollen zoustänneg. D'Agenten, déi mat de Kontrolle beoptraagt sinn, hunn de Statut vum engem Officier de police judiciaire. Si mussen eng spezialiséiert Formatioun absolvéieren, déi sech op d'Feststellung vun Infractionen an op d'penalrechtlech Bestëmmunge bezieht.

Fir méiglech Verstéiss opzedeecken an déi néideg Beweiser ze sécheren, kënnen dës Agenten ënner anere Inspektiounen duerchféieren an Analysen oder Tester vun de concernéierte Produite virhuelen.

De Projet definéiert gläichzäiteg kloer de Kader vun dësen Interventiounen: D'Kontrolle beschränkt sech op d'Raimlechkeeten, d'Installatiounen, d'Equipementer, d'Sitten an d'Transportmëttel vun den Operateuren souwéi och hir Onlineshops.

Am Fall vun enger festgestallter Nonconformitéit gesäit de Projet souwuel administrativ Mesüer wéi och penal Sanktiounen vir. Bei de penale Sanktiounen gëtt tëschen Kontraventionen an Delikter ënnerscheet. Kontraventionen kënnen mat enger Geldstrof vun 150 bis 2.000 Euro bestrooft ginn. Delikter kënnen mat Prisonsstrofen a Geldstrofe vun 2.001 bis 250.000 Euro sanktionéiert ginn.

Nieft dës penale Sanktiounen gëtt och d'Méiglechkeet vun engem Avertissement taxé agefouert. Dëst erméiglecht et, manner schwéier Verstéiss op eng proportionéiert an effizient Aart a Weis ze sanktionéieren, ouni direkt op eng schwéier penal Prozedur zrëckzegräifen.

Eng weider wichteg Komponent vum Projet ass de Mechanismus vun den Noutmoosnamen. Wann eng Situatioun et verlaangt, kënnen direkt Mesüer geholl ginn. Dës mussen allerdéngs bannent 48 Stonnen duerch eng ministeriell Decisioun confirméiert ginn, nodeems de concernéierten Operateur gehéiert oder convoquéiert gouf.

Zousätzlech gesäit de Projet e Regime vun Astreinté vir. Dës zivilrechtlech Mesür déngt dozou, den Operateur dozou ze bréngen, déi festgestallten Nonconformitéiten ze behiessen. Et handelt sech dobäi net ëm eng penal Strof, mee ëm e Mëttel dofir, d'Respekteiere vun de gesetzleche Verflüchtungen fir d'Zukunft ze garantéieren.

De Projet féiert och e System fir den Enregistrement an den Agreement vun Operateuren an, souwéi d'Féierung vun engem ëffentleche Register. Dëst stäerkt d'Transparenz an d'Traçabilitéit am Secteur vun der Fuddermëttelproduktioun.

Här President, de Projet gouf de 5. Abrëll 2023 vum viregte Minister Claude Haagen an der Chamber deposéiert.

Plusieurs voix | Très bien!

M. Jeff Boonen (CSV), rapporteur | De 24. November 2023 ass de Projet un eis Kommissioun verwise ginn, fir en am Detail ze analyséieren.

Den 9. Oktober 2025 huet d'Landwirtschaftsministeresche Martine Hansen der Agrarkommissioun de Projet souwéi 20 Amendementer presentéiert. Dës hunn dem Avis vum Staatsrot an de Beruffskommere Rechnung gedroen. Si klären d'Veerteelung vun de Kompetenzen zwëschen dem Minister an der ALVA, sou wéi dat och bei de viregte Projekte war, a vereinfachen de Regime vun den Taxen duerch d'Fusioun vun de jeeweilegen Dispositiounen. Ausserdeem gëtt d'Ënnerscheedung tëschen obligatoreschen a fakultativen Taxen, déi am éischten Text virgesi war, opgehuewen. Och de Katalog vun den Infractionen gëtt ugepasst, fir dem Prinzip vum der Spezifitéit vun den Inkriminatiounen gerecht ze ginn. Zousätzlech gëtt en neien Artikel iwwert d'administrativ Sanktiounen agefouert, am Aklang mat den anere sektoriellen Texten am Beräich vun den offiziellen Kontrollen. D'legistesche Observatiounen vum Staatsrot goufen integréiert, fir d'Kohärenz, d'Kloerheet an d'Rechtssécherheet vum Text ze verbesseren.

Ech géing dann nach kuerz duerch d'Avisen goen. De Conseil d'État huet haaptsächlech op d'Kloerstellung vun de Kompetenzen zwëschen dem Minister an der ALVA higewisen, sou wéi dat och scho bei dem Projet de loi 8300 de Fall war. Déi héich Kierperschaft huet ënner anere och Detailler bei der Formatioun vun den Agenten a bei de Sanktiounen vun den Infractionen gefuerdert.

A sengem zweeten Avis hieft de Staatsrot d'Opposition-formellen op, bis op eng am Zesammenhang mat den Taxen respektiv de Sanktiounen, wann een net bezitt. Déi héich Kierperschaft fuerdert des Weiteren Iwwergangsbestëmmungen, well d'Gesetz vum 19. Mee 1983 iwwert d'Kontroll vum Déierfudder ofgeschaaft gëtt, ouni datt et ersat gëtt. An hie proposéiert eng Korrektur beim Intitulé: „Projet de loi relative aux contrôles officiels des aliments pour animaux“ (veuil- lez lire: „Projet de loi relative aux contrôles officiels et autres activités officielles en matière d'aliments pour animaux“).

D'Chambre des Métiers an d'Chambre de Commerce begréissen de kloer juristesche Kader a fuerderen eng Harmoniséierung vun de Kontrollsystemen an eng gerecht Behandlung vun allen Acteuren, inklusiv enger gerechter Reegulierung fir d'Publikatioun vun de Kontrollresultater.

D'Landwirtschaftskammer fuerdert ënner anere dem Avis vum Staatsrot d'„infraction grave“ a kloer Reegelen beim Zougang zu de Raimlechkeeten. Si kritiséiert och d'Ofschaffung vum Gesetz vum 1983 an déi nei Obligatiounen, déi och fir selwer produzéiert Fudder gëllen. Si fuerdert d'Zesummefaassung vun de Kontrolltexten an engem eenzege Gesetz. D'Chamber huet am komplementären Avis vun dësem Februar nach eng speziell Reserv gemaach, fir de Begrëff vun der „infraction grave“ ze erhalen an esou den Zougrëff op Lokaler op tatsächlech schwéier Fäll ze limitéieren.

Fir weider Detailler verweisen ech dann op mäi schrëftleche Rapport an ech géif elo nach am Numm vu menger Fraktioun e puer Wuert soen.

Discussion générale

Wéi meng Kolleegin Stéphanie Weydert an och aner Virriedner scho gesot hunn: Och deen hei Projet de